

四庫全書

史部

欽定四庫全書

史部

世宗憲皇帝聖訓卷九至
十一

臣 永瑤 恭 校

編修臣 裴謙 覆 勘

總校官原任中允臣 王燕緒

校對官中書臣 王鍾泰

謄錄監生臣 薛登瀛

欽定四庫全書

大清世宗敬天昌運建中表正文武英明寬仁信毅大孝
至誠憲皇帝聖訓卷九

法祖

康熙六十年十一月丁酉

上諭總理事務王大臣等先因京師米價騰貴

皇考宵旰焦勞特命朕查視各倉彼時見倉糧充溢露積
不少因請將應行出倉之米迅速辦理蒙

旨俞允朕今仰體

皇考軫恤民生至意務令米價漸平著交與監督張坦麟陳守創等會同倉場總督帶領工部賢能司官將倉廩確實料估應修補者速行修補應添建者於明歲春初添建所需錢糧動用捐貯驛站銀兩其應否補項之處再議此事並非此時應下之旨係遵奉

皇考原下之要旨是以特諭

是日

上諭總理事務王大臣等

皇考念切天下兵民生計因京師米貴焦思極慮當

龍馭上賓之時猶惓惓未釋於懷向來口外米穀不准運進口內而燒鍋仍照常開設可速令口外米穀准其進口其開設燒鍋著行禁止

雍正元年癸卯正月戊子大學士等議奏纂修

聖祖仁皇帝實錄事宜

上諭曰

皇考御極六十一年

聖謨神烈甚多卿等督率各官務期悉心敬纂速輯告成
俾永垂方冊以副朕繼述顯揚先德之意

四月乙丑

上諭翰林院自古帝王臨朝施政右史記言左史記動蓋
欲使一舉動一出言之微無不可著為法則垂範百世
也

皇考聖祖仁皇帝英年踐阼即設日講起居注官於詞臣

中擇其才品優長者以原官充補鉅典茂昭度越前代
誠為聖帝哲王之盛事御極六十一年紹精一執中之
統勵敬

天勤民之心文謨武烈經緯萬幾盛德日新大業鴻顯天
下臣民仰瞻至治不啻日月麗天江河行地莫不敬信
悅服記注之臣美不勝書

皇考聖祖仁皇帝謙德彌光聖不自聖唯恐史官或多溢
美之詞故康熙五十六年以後裁省記注祇令翰林五

員於理事時輪侍班行凡有重務要旨仍令內閣諸臣
記而存之意至周深也茲朕繼承大統夙夜兢業日昃
不遑思所以上繼

皇考功德之隆下致四海晏安之治顧惟涼德深懼負荷
之難今御門聽政之初益當寅畏小心綜理庶事咸期
舉措允宜簪筆侍臣何可闕歟當酌復舊章於朕視朝
臨御祭祀

壇

廟之時令滿漢講官各二人侍班不獨記載諭旨政務或朕有一言之過一事之失皆必據實書諸簡策朕用以自警冀寡悔尤庶幾凜淵冰之懷以致久安慎樞機之動以圖長治其仍復日講起居注官如康熙五十六年以前故事爾衙門即遵旨行

雍正二年甲辰二月丙午初

聖祖仁皇帝

御製上諭十六條頒示八旗及直省兵民人等自綱常名

教之際以至耕桑作息之間本末精粗公私鉅細
各舉要領垂訓萬世

上以各條遵行日久慮民或怠宜申誥誡以示提撕廼復
尋繹其義推行其文共得萬言名曰

聖諭廣訓竝製序文刊刻成編頒行天下序文曰書曰每
歲孟春適人以木鐸徇於路記曰司徒修六禮以節民
性明七教以興民德此皆以敦本崇實之道為牖民覺
世之模法莫良焉意莫厚焉我

聖祖仁皇帝久道化成德澤恩溥仁育萬物義正萬民六十年來宵衣旰食祇期薄海內外興仁講讓卑薄從忠共成親遜之風永享昇平之治故

特頒上諭十六條曉諭八旗及直省兵民人等自綱常名教之際以至於耕桑作息之間本末精粗公私鉅細凡民情之所習皆

睿慮之所周視爾編氓誠如赤子

聖有謨訓明徵定保萬世守之莫能易也朕纘承大統臨

御兆人以

聖祖之心為心以

聖祖之政為政夙夜黽勉率由舊章惟恐小民尊信奉行久而或怠用申誥誡以示提撕謹將

上諭十六條尋繹其義推行其文共得萬言名曰

聖諭廣訓旁徵遠引往復周詳意取顯明語多直樸無非奉

先志以啓後人使羣黎百姓家喻而戶曉也願爾兵民等

仰體

聖祖正德厚生之至意勿視為條教號令之虛文其勉為
謹身節用之庶人盡除夫浮薄囂陵之陋習則風俗醇
厚家室和平在朝廷德化樂觀其成爾後嗣子孫並受
其福積善之家必有餘慶其理豈或爽哉

雍正四年丙午九月戊戌

上御乾清宮西暖閣召皇子諸王大臣等賦詩賜宴

親製序文宣示諸臣曰朕繼大統惟朝乾夕惕兢兢仰法

皇考期賢哲盈廷民康物阜永承至隆之

聖治嘗思古之明良賡歌喜起君臣一德同心曠代為之
欣慕今在廷臣工協衷以資贊理顧瞻濟濟皆我

皇考數十年教育栽培之所詒也是以庶政具舉兆民樂
業朕實嘉賴焉康熙二十一年春

聖祖於乾清宮開昇平之讌振賡揚之歌盛稱一時美冠
千古今丙午九月節屆重陽覽百穀之斯登忻三農之
有稔光風溢目海宇澄清爰集王公卿尹用陳几筵笑

言勿禁威儀不拘相悅於一堂弗限夫三爵然禮著享
燕之義詩有嘉賓之詠古君臣於飲食燕會間即具獻
納拜颺之典也唐虞文武之世休風如昨朕與諸卿宜
則倣之今用柏梁體朕為倡始諸卿遞成篇什今日也
非徒命酒徵歌揚華摘藻蓋欲昭

聖祖養育之深思朕廷泰交之雅會垂之奕世永傳斯事
云爾

十月戊辰

上諭諸王大臣等我

皇考聖祖仁皇帝臨御六十餘年富有四海而躬行儉德
樽節愛養以為保惠萬民之本此中外臣民所共知者
從來宮中服御之具惟尚質樸無華至於古玩器皿皆
尋常平等之屬竟無一物為人所罕見可珍奇者此等
事朕向來且不深知則外廷臣工又何從而知之朕即
位後偶令內監將大內所有玩器稽查檢點並將避暑
山莊等處歷年陳設之物其中可觀者皆取回宮中看

來較朕藩邸所藏尚屬不逮益欽服我

皇考之至德卽此一節已超越前古矣偶因閒暇憶及實不忍令

皇考盛德異日湮沒而不彰特書此以留示子孫俾知

皇考之節用愛人戒奢崇約不獨溥鴻恩於萬姓亦且留厚福於子孫而世世追思

聖德祇遵

聖訓敬謹奉行毋稍踰越此又人人所當自勉者也

十一月己亥

上諭內閣帝王體國經邦政治所施惟準乎道理之至當
寬嚴賞罰各得其宜若一涉利弊二字便入於私是以
孟子云仁義而已矣何必曰利益仁所以休養安全義
所以裁成化導也朕嗣承大統四年於茲凡政教號令
皆遵法

皇考

皇考在位六十一年

聖謨弘遠

諭旨周詳紀綱法度靡不備舉特當時臣下或有陽奉陰違不能實力遵行者或有事經歷久漸至廢弛者朕在藩邸時知之甚悉即位以來仰體

皇考仁育義正之心屢降明旨諄諄誥誡無非欲内外大小臣僚咸恪遵

皇考之良法美政實心奉行以共成久安長治之盛是朕所行之政皆

皇考已行之章程朕所申之令皆

皇考已申之寶訓實未嘗有所減省增益也特以歷年既久新進疎遠之臣未能悉知見朕所施之政令遂以為從前所未有而淺陋寡識之人往往於陳奏內有衆利皆興諸弊俱除之語朕經理天下凡用人行政悉本大中至正之心事至而應惟理所當然從無計及利弊之私意如謂興利除弊則凡平治道路疏濬河渠修葺城垣開墾田畝此國家經野之常典而可謂之興利乎年

歲豐歉不齊設有水旱為之賑饑平糶蠲賦緩徵此朝廷軫恤之恒政而可謂之興利乎老人應賜以衣食則賜之孤獨應卹以錢物則卹之勸以孝弟本小民自有之天良勗以耕桑固閭閻各盡之職業而可謂之興利乎至於盜賊奸宄法所應誅貪官汚吏法所應黜豪紳劣衿法所應鋤而謂誅盜奸黜貪汚鋤豪劣為除弊可乎情罪重者予以刑辟情罪輕者予以矜釋此又謂之除弊可乎欲正民風而端士習不得不戒之用休董之

用威也將以此為興利乎抑除弊乎念習俗之流於奢靡也朕躬行節儉以身示天下慮農人之情於南畝也朕親為耕藉以身先天下將以此為興利乎抑除弊乎夫存興利之心即有不利之害有除弊之意即為啟弊之端由此類推治道安得有利弊之名朕又何嘗有興利除弊之舉也

皇考六十餘年豐功偉烈布在方策皆因事治事以人治人從不居興利除弊之名而以此頌揚朕之政事朕實

不敢當朕亦不願當也外省督撫諸臣未能深悉朕意
為此曉諭知之

雍正六年戊申八月己丑

上諭內閣

世祖皇帝御製人臣儆心錄刻板收貯禮部著交武英殿
將滿漢文各印千本進呈其板內字畫圈點有應加修
整者著武英殿人員校看辦理

雍正七年己酉八月丁未

上諭內閣朕自御極以來時時以牖民覺世為懷是以告
誠臣工訓誨士庶化導兵弁者周詳往復不憚煩勞無
非欲其慕義嚮風遷善改過共遊於蕩平正直之途也
凡此詔諭所頒皆以

皇考之心為心以

皇考之政為政繼志述事率由舊章當時

聖諭之所啓迪包涵者朕則闡揚而詳發之其中間有因
革損益先後不同者則因時制宜化裁變通之道也惟

是歷年諭旨或因一省而發或因一事而發有司等照
例宣示於該管之處其別省遠地豈能一一周知且傳
寫悉經書吏之手字句之間往往錯訛遺漏夫欲使薄
海之廣臣民之衆遵道遵路易俗移風必使天下之人
備聞朕訓深知朕心庶幾感發奮興以為進德修業之
助今王大臣等合詞奏請上諭刊刻有裨益於人心吏
治著照所請行朕亦不敢謂朕之諭旨可以有勞來匡
直之功惟冀億萬臣民共知朕提撕儆戒之苦心耳

九月乙酉

聖祖仁皇帝治河方略編纂告成

上諭內閣朕惟

聖祖仁皇帝軫念民生而於黃運兩河尤厯

聖懷自甲子以迄丁亥六次

親厯河干指授方略一切修築堵塞事宜無不出自

宸衷規畫數十年來

聖謨睿訓備載此書凡有河防水利之任者皆應悉心詳

閱奉為法則著繕寫三部發給河臣孔毓珣琿曾筠尹
繼善令其敬謹閱看必於河務大有裨益但河性遷移
或今日情形與昔年有不同之處著孔毓珣等三人會
同商酌具奏又當年或有奉

旨案件此書未經載入而該衙門有檔可稽者亦著查明
具奏

雍正八年庚戌二月乙巳諸王大臣奏本年正月
二十五日

景陵寶城山上產靈芝三本請宣示史館永紀鴻庥

上諭曰

景陵寶城山上首春產瑞芝三本諸王大臣等奏為朕純孝之所感孚朕撫躬自問生平事我

皇考不敢當純孝之名但誠敬之心數十年如一日自御極以來不但一言一事仰體

聖心而後見諸施行即夢寐之中一念舉發從無有知其不合

聖意而敢存於胃臆者諸王大臣等稱朕以

皇考之心為心此實朕之惓忱至云朕以

皇考之政為政朕之才力遠不逮我

皇考舉凡宣猷敷治之間雖黽勉效法究不能企及於萬
一何能致芝草之嘉祥諸臣以此歸美於朕朕不居也

實因我

皇考之聖德神功際天蟠地深仁渥澤積厚流光

上天特欲顯示天下臣民是以數年之中三見芝英於

陵寢以今之厯霜雪而挺生當首春而呈瑞稽諸史冊更屬罕聞朕感

上天昭示之洪恩叨

皇考貽謀之景福慶幸歡欣不敢不宣布於衆庶使天下後世臣民知

上天之眷祐

皇考與

皇考之垂裕萬年者即瑞芝一事明顯昭著信而有徵固

如是也著照所請宣付史館

雍正九年辛亥十二月己酉恭纂

聖祖仁皇帝實錄聖訓告成諸王貝勒貝子公及文武各

官等奏賀

上傳制曰

皇考聖祖仁皇帝厚德豐功彌綸宇宙光天之下知識之

倫莫不霑被

聖化歌詠太平朕纘承統緒於

皇考一言一動時時奉為法守爰命大學士等恭輯

實錄聖訓茲者纂修告成朕得朝夕誦述身體力行亦俾
萬世子孫臣民欽遵弗替朕心慰悅與卿等同之

大清世宗敬天昌運建中表正文武英明寬仁信毅大孝
至誠憲皇帝聖訓卷九

欽定四庫全書

大清世宗敬天昌運建中表正文武英明寬仁信毅大孝
至誠憲皇帝聖訓卷十

文教

雍正元年癸卯正月辛巳

上諭督學朕惟自古帝王皆以興賢育才為務我國朝自
太祖

太宗肇造鴻圖

世祖定鼎中夏首隆學校加意人才開國規模超越前古
至我

皇考聖祖仁皇帝御極六十一年培養教育怙冒涵濡深
仁厚澤有加無已

御製訓飭士子文頒布學宮東西南朔海濱山陬戶習詩
書家敦禮樂遐邇無不嚮風文教之隆莫過於此矣朕
纘承大統遵守舊章寤寐求賢惟恐或失念學校為士
子進身之階督學一官尤人倫風化所繫遴選各省學

臣倍加鄭重爾等須廉潔持身精勤集事實行文風兩者所當並重若徒事文華而不敦崇實行猶未為盡職也表揚忠孝節義崇祀先聖先賢訪求山林隱逸搜羅名蹟藏書而衡文一道專以理明學正典雅醇潔為主古人云言乃心聲氣由風養必士品端而後文風正他日為國家柱石為朝廟羽儀不綦重歟勿私納苞苴勿瞻徇情面勿輕視武途勿濫取祠廕勿矯激沽名勿昏庸廢事勿卑污貶節勿驕暴陵人胥吏必謹闕防幕客

尤宜選擇如此則內外交悉本末兼修上不負朝廷下不愧多士朕耳目所及必有見聞若罔顧聲名廉隅不飭國有常憲罰必隨之尚其勉旃毋忽

五月乙未

上諭吏部國家大典首重掄才必主司鑑空衡平內外簾官協心共事加意釐剔放榜後方得士心悅服京師首善之地關係尤重朕於雍正元年特行開科并廣額數欲振興文教俾單寒績學之士人人自奮今順天主考

朱軾張廷玉公慎自矢細心搜閱盡拔佳文內外簾官亦能各自淬礪屏除弊端榜發之日輿論翕然朕心甚為嘉悅其酌加議叙用示優獎兼使嗣後考官咸知激勸以副朕興賢育才之意

己亥

上諭大學士等考經一書與五經並重蓋孝為百行之首我

聖祖仁皇帝欽定孝經衍義以闡發至德要道誠化民成

俗之本也鄉會試二場向以孝經為論題後改用太極圖說通書西銘正蒙夫宋儒之書雖足羽翼經傳豈若聖言之廣大悉備今自雍正元年會試為始二場論題宜仍用孝經庶士子咸知誦習而民間亦敦本勵行即移孝作忠之道胥由乎此又聞各省鄉試房考凡州縣官由科甲出身者止許入闈一次夫考官以秉公精鑒識拔人才為主何論曾否入闈嗣後凡遇鄉科各省督撫臨場調齊科甲出身之員不論己未分房監臨試以

時藝一篇其文理優長者為內簾房考荒疎者供外場
執事則分校得人而佳文盡拔矣朕於雍正元年開科
廣額總欲鼓勵人才興起教化著該部通行直省督撫
俾副朕崇教育才之意

七月丙午

上諭禮部湖南士子赴湖北鄉試必經由洞庭湖湖水浩
瀚無涯波濤不測六七月間風浪尤險間有覆溺之患
朕心甚為惻然或至士子畏避險遠裹足不前又非朕

廣育人材之意今欲於湖南地方建立試院每科另簡
考官俾士子就近入場永無阻隔之虞共遂觀光之願
明年二月為鄉試之期爾部可即行文湖南巡撫若能
於二月之前預備場屋則於明春即分湖北湖南兩闈
考試倘為期已迫預備不及則於下科舉行至於湖廣
通省取中原有定額今既分兩闈其取中之數應如何
分別之處著湖南湖北巡撫公議湖廣總督從公酌定
具奏

十一月乙巳

上諭大學士等向來庶吉士學習清書散館之後每至荒廢殊為可惜嗣後清書散館之翰林不可令其荒廢今年新科進士選拔庶常朕意學習清書者少派數人令其盡心學習務期通曉散館後亦不可荒廢或在翰林或在部曹即令與滿員一同繙譯如此方實有裨益新科進士於引見之前朕欲先行考試知其學問再行引見選拔庶人才不致遺漏目今天氣寒冷一應仍照殿

試預備考試題目朕將詩文四六各體出題視其所能
或一篇或二三篇或各體俱作悉聽其便

雍正二年甲辰二月丙午

上諭都察院元年恩科典試諸臣皆體朕意矢公矢慎應
試士子亦皆恪遵功令未敢苟且鑽營自臨場以至發
榜前後俱各帖然今聞應試士子不比去年安靜竟有
投送詩文往來干謁者現今開列之同考官若少為其
所搖動乃自取罪戾也朕賞罰悉秉至公今場前既多

奔競榜後必生事端今歲同考官當加意謹慎毋蹈法網都察院即頒示曉諭應試士子宜安分守法毋得希圖僥倖仍實心察訪如有鑽營彰著者即行拏叅治以重罪

三月乙亥

上諭禮部等衙門治天下之要以崇師重道廣勵澤宮為先務朕親詣太學釋奠

先師孔子禮畢進諸生於彝倫堂講經論學凡以明道

術崇化源非徒飾園橋之觀聽也維

孔子道高德厚萬世奉為師表其祔享廟庭諸賢皆有
羽翼聖經扶持名教之功然歷朝進退不一而賢儒代
不乏人或有先罷而今宜復有舊缺而今宜增其從祀
崇聖祠諸賢周程朱蔡外孰應升堂祔享者並先賢先
儒之後孰當增置五經博士以昭崇報均闕大典九卿
翰林國子監詹事科道會同詳考定議以聞再邇年文
教廣被由我

聖祖仁皇帝壽考作人六十年山陬海澨莫不讀書稽古
直省應試童子人多額少有垂老不獲一衿者其令督
撫會同學臣查明實在人文最盛之州縣題請小學改
為中學中學改為大學大學照府學額數取錄督撫等
務宜秉公詳查不得徇私冒濫至鄉試解額

聖祖仁皇帝屢次增廣乙酉戊子等科復於額外加中五
經三名至五十六年而罷以其久而滋弊也嗣後各學
臣及祭酒司業於錄科時先加面試主考閱文果佳本

監加中四名直隸各省大小不一某省應加中幾名著
分別詳議定數具奏如無佳文寧缺勿濫會試臨時請
旨本監貢生監生本科鄉試中式著加增十八名朕臨
雍講學雖率由舊章然必期於世道文教有益不蹈一
切虛文諸生其各欽遵

己卯

上諭國子監祭酒司業等官朕惟聖人之道昭揭日月彌
綸天地萬世帝王下逮公卿士庶罔不仰遵成憲率由

教言我國家尊崇

至聖遠邁前代朕繼承大統古訓是學惟日孜孜茲雍正二年三月朔日親詣辟雍祇謁

先師孔子行釋奠禮思以鼓勵羣英丕隆文治爾監臣宜嚴督諸生善為誘導諸生亦宜殫心肄業實踐躬行秉端方以立身敦忠孝以興誼勿營奔競勿事浮華文必貴於明經學務期乎濟世俾品成詣進以副朕教育至意此爾多士之床亦惟爾監臣董率之功也慎勿怠

荒職業以貽爾羞諸師生其共勉之

五月甲辰

上諭兵部陝西地屬雍涼人材壯健強勇者多騎射嫻熟勝於他省每科鄉試取中不過三十名而入學額數亦與他省不相上下額少人多不無屈抑自雍正四年鄉試為始西安甘肅武舉各加中十名其武童入學額數若通省俱加恐有冒濫照文童改學例令督撫會同學臣查明技勇最優之州縣酌量數目奏請加額

八月甲戌

上諭禮部鄉會試為掄才大典內外簾官子弟理應迴避但跋涉數千里志切觀光既至京師不得與試深為可憫朕於上科特降諭旨另行考校然此只可暫行不便著為定例今科凡官員入闈者其子弟著一體應試將試卷另封進呈朕派大臣校閱遴選庶人才不致屈抑至於闈中謄錄試卷弊端甚多其有賄囑者則書寫精工否則潦草舛錯致誤佳文著知貢舉及監試御史嚴

行申飭其謄寫不工者必重加責懲令其重寫並令對
讀官嚴飭各生悉心校對勿使字畫錯誤倘外簾官失
於查察日後發覺將該管官員一並嚴加議處

十一月癸卯

上諭禮部考試繙譯舉人不必分作三場只須一次考試
一日一夜量其所能章奏一道或四書或五經酌量出
一題其優劣便已可見此考試並無漢文不必派漢大
臣再考試舉子俱係八旗內人其繙譯好者衆所共知

即字蹟亦最易識認伊等試卷應行謄錄著於六部各衙門善書之筆帖式內酌量足用選取令其謄寫選中之卷進呈時再定額數仍選備卷呈覽其分校及巡察等員亦俱照文鄉試例派用

十二月癸酉

上諭禮部工部國子監進士題名之典始於唐時新進士榜後於慈恩寺塔下題名立碑自宗明以至我朝皆建碑於國學按其甲第先後勒載姓名籍貫於上所以重

科名也今太學

聖廟戟門外所立本朝歷科題名碑自順治丙戌科起至康熙戊戌科而止稽之會典諸進士釋菜後禮部題請工部給建碑銀一百兩交與國子監立石題名康熙三年輔政大臣裁省自後每科諸進士各自捐貲立石我國家振興文教凡鄉試會試動用帑金數萬朕即位之始即開恩科誠以科目一途實闢用人取士之要題名之典豈宜缺焉著工部動用正項錢糧令國子監將

雍正癸卯甲辰兩科題名碑速行建立康熙辛丑科亦
宜補建嗣後每科仍照舊例題請庶士子觀覽此碑知
讀書登榜之榮益勵其潛修上達之志爾該衙門即遵
諭行

雍正四年丙午四月丁丑

上諭各省鄉試正副考官朕御極以來屢次開科取士凡
屬考官皆擇人品端方素行謹恪者為之而諸臣果慎
守法度洗滌弊端各省榜發士林皆無異議但聞試官

之內偶有學問不及而所取之文未盡滿人意者是以去年朕將在京科目出身官員應開列正副主考者通行考試分別等第記名以備簡用今鄉試屆期將記名人員掣籤命往使典試事夫文行原無二理豈有文藝優通而品行卑劣者況國家以文章取士爾等以文章發科今膺鑑衡之任若文優而行劣使天下之人謂文章一道全無足憑則是讀書通籍之人貽玷於名教國法尚可容乎料爾等必無此事但朕慎重科場大典不

得不諄諄告誡爾等其共加勉勵勿負朕心

九月丁巳

上諭內閣為士者乃四民之首一方之望凡屬編氓皆尊之奉之以為讀聖賢之書列膠庠之選其所言所行俱可以為鄉人法則也故必敦品勵學謹言慎行不愧端人正士然後以聖賢詩書之道開示愚民則民必聽從其言服習其教相率而歸於謹厚或小民偶有不善之事即懷愧恥之心相戒勿令某人知之如古人之往事

則民風何患不淳世道何患不復古耶朕觀今日之士雖不乏閉戶勤修讀書立品之人而蕩檢踰閑不顧名節者亦復不少或出入官署包攬詞訟或武斷鄉曲欺壓平民或抗違錢糧藐視國法或代民納課私潤身家種種卑污下賤之事難以悉數彼為民者見士子誦讀聖賢之書而行止尚且如此則必薄待讀書之人而并且輕視聖賢之書矣士習不端民風何由而正其間關係極為重大朕自即位以來加恩學校培養人材所以

教育士子者無所不至宜乎天下之士皆鼓舞奮興爭
自濯磨盡去其佻達之習矣而內外諸臣條奏中臚列
諸生之劣蹟請行嚴懲者甚多朕思轉移化導之法當
先端其本原教官者多士之儀型也學臣者教官之表
率也教官多屬中材又或年齒衰邁貪位竊祿與士子
為朋儔視考課為故套而學臣又但以衡文為事任教
官之因循怠惰苟且塞責漫不加察所以倡率之本不
立無怪乎士習之不端風俗之未淳也朕孜孜圖治欲

四海之大萬民之衆皆嚮風慕義革薄從忠故特簡督學之臣慎重教官之職欲使自上而下端本澄源以收實效也凡為學臣者務須持正秉公宣揚風化於教官之稱職者即加薦拔溺職者即行叅革為教官者訓誨士子悉秉誠心如父兄之督課子弟至於分別優劣必至公至當不涉偏私如此各盡其道則士子人人崇尚品詣砥礪廉隅不但自淑其身而羣黎百姓日聞善言日觀善行必共生感發之念風俗之丕變庶幾其可望

也

雍正五年丁未三月庚寅

上諭禮部朕以今年閏月節氣稍遲二月天寒故將會試日期改至三月但目今天氣尚覺寒冷若再改期又恐舉子盤費無多難以久於旅食今照舊於初八日入場著晚諭各舉子俱許攜帶手爐以溫筆硯皮衣及厚綿衣服俱許穿進但不得乘機懷挾以滋弊端場內茶飯著供給官加意預備朕另派大臣照看料理令早晚給

與董湯并按名給發木炭以資其用

乙未

上諭內閣士子讀書應試須專心講習方可望其成就八
旗舉人生員內在護軍執事人行走者朕念其用度艱
難恐致分心是以於雍正元年特加殊恩令其退回仍
賞給錢糧養贍俾得專心讀書勉勵上進庶國家可收
得人之益今已三年有餘其中或有年力衰邁及不肖
之人徒領錢糧無志上進虛糜國帑者亦未可知若不

加考課分別勤惰無以鼓勵人才著於會試後將八旗滿洲蒙古舉人生員漢軍舉人查明人數請題考試分別等第竝驗其人品優劣具奏

辛亥禮部奏會試舉人叨荷

特恩合詞陳謝

上諭曰朕視天下萬民皆為一體況讀書鄉薦之人異日俱可作朕股肱耳目是以朕心待之實有一體聯屬之意愛養培養皆出於中心之自然竝非欲邀天下士子

之感頌也今舉子等以會試叨荷特恩合詞陳謝是尚不能深悉朕一體相關之意而存上下彼此之形跡矣朕待天下惟有一誠而崇儒重道之心尤為篤切但所崇者皆真儒所重者皆正道若徒尚虛文邀取名譽致貽世道人心之害朕不忍為也爾等讀書之人實四民之所觀瞻風俗之所維繫果能誦法聖賢躬修實踐宅心正直行己端方則通籍於朝必能為國家宣猷樹績膺棟梁之選即退處鄉閭亦必能教孝勸忠為衆人之

坊表故士習既端而人心尚有不正風俗尚有不淳者
無是理也爾等既感朕恩即當仰體朕心恪遵朕訓爭
自濯磨或出或處皆端人正士為國家所倚賴如此方
為實心報効不在感恩奏謝之儀文也

四月己丑吏部遵

旨將會試下第舉人挑選各省教職引

見

上諭曰教官有董率士子之責果能實心訓導使諸生讀

書循理無佻達囂陵之習則齊民有所觀法風俗可望
淳厚所闕非淺鮮也乃向來教職因循偷惰全不以教
訓為事朕屢頒諭旨而積習如故因於爾等下第舉人
中擇文理明通者引見命往諭爾等科分名次尚非應
選之人朕加恩特用務須勉力供職加意訓誨六年之
內如果著有成效督撫題薦朕格外加恩如有負職守
經督撫題叅朕不姑容也

十一月庚申

上諭內閣朕惟漢史始志地理蓋本禹貢職方之遺而條其郡邑紀其戶口以宣究其風俗教化也今各省皆有志書惟八旗未經紀載我朝立制滿洲蒙古漢軍俱隸八旗每旗自都統副都統叅領佐領下逮領催閒散人體統則尊卑相承形勢則臂指相使規模宏遠條理精密超越前古豈可無以紀述其盛況其間偉人輩出樹宏勲而建茂績與夫忠臣孝子義夫節婦潛德幽光足為人倫之表範者不可勝數若不為之採摭薈萃何以

昭示無窮朕意欲論述編次彙成八旗志書年來恭修
聖祖仁皇帝實錄今已漸次告成即著諸總裁官領其事
選滿漢翰林分纂其滿洲漢軍內有通曉漢文而學問
優長堪備纂修之任者無論進士舉人貢監生員以至
閒散人等俱著該旗都統副都統保送但勿徇情濫舉
以副朕慎重著述之至意

十二月乙酉

上諭禮部直省拔貢舊例十二年題請舉行一次後因各

省學政不能秉公選取國子監未便照例請行於雍正元年特行一次朕思各州縣每年歲貢較其食廩淺深挨次出貢內多年力衰邁之人欲得人材必須選拔著各省學臣於科考時照例府學拔取二名州縣學拔取一名寧缺勿濫務取學問優通品行端方才猷可用之人令其來京朕將親加考驗令入國子監肄業如有學問荒陋人品不端才具庸劣者將該學政嚴加議處嗣後六年選拔一次國子監屆期題請候旨

雍正六年戊申十一月丙辰

上諭內務府咸安宮房屋現在空閒著設立官學將包衣
佐領內管領之子弟並景山官學生內揀選穎秀者或
五六十名或一百餘名入學肄業

壬戌工部等衙門議覆川陝總督岳鍾琪議奏插
漢拖輝地方新設兩縣暫停建立學校

上諭曰招徠人民已有四千餘戶朕思其中亦多讀書之
人若必俟人文蔚起始行考取恐遠方士子目前阻其

讀書上進之階應將兩縣中現在讀書願就考試者許其附入隣近州縣考試酌量加額收錄入學俟兩縣人文漸盛建學設官之日仍行撥入本學庶為妥協

雍正七年己酉正月癸酉

上諭禮部士子者百姓所觀瞻士習不端民風何由得厚是以考課士子設立舉優黜劣之典以為移風易俗之道所關亦綦重矣無如教官愚懦無能學臣因循苟且往往視為具文奉行不力每當學臣按試之時教官輒

以無優無劣具文申詳草草塞責如此則善者何由而
勸不善者何由而懲夫善者之湮沒不彰一時尚難覺
察而不善之人僥倖苟免於目前不旋踵而劣蹟敗露
每見蕩檢踰閑犯法亂紀之士子皆從前學臣教官之
未曾開報劣行者其間情罪雖難一一追究然即此可
知其中之容隱不少矣嗣後若教官沽名邀譽縱容劣
生不行舉報者經學臣察出立即指叅將教官照溺職
例革職若學臣瞻徇情面不行糾叅者一經發覺將學

臣照徇庇例降級調用著將此永著為例

二月辛巳

上諭內閣考官專司衡文之任必須學問明通者始能鑒別不爽雍正三年曾將在京科目出身應充正副考官之員通行考試分別等次記名於雍正四年掣籤命往各省使典試事今已越三年從前考取人員其中陞遷外任及告假回籍者甚多即有在京者其所學或以日久荒疎而前此之未曾入選者今用數年之功文藝未

必無所進益且陸續新到之員亦復不少著照雍正三年之例通行考試俟朕分別記名以備持衡之任有不願就試者亦聽其意

閏七月丁酉

上諭內閣八旗之貢監生員已經考取小京官筆帖式者若願就鄉試俱准其與舉子等一同入場使片善寸長不致遺棄以副國家教養人材之典

十二月癸丑大學士九卿等奏據督修

孔廟工程通政使留保等奏報十一月二十六日午刻

正當

孔廟上樑之前二日慶雲見於曲阜縣請宣付史館

上諭曰朕平素尊奉

先師至誠至敬雍正二年闕里

文廟不戒於火彼時廷臣援明代弘治前事為言而朕
心悚懼不寧引過自責親詣太學

文廟虔申祭告特發帑金命大臣等督工修建凡殿廡

制度規模以至祭器儀物皆令繪圖呈覽朕親為指授
遴選良工庀材興造虔恪之心數年以來無時稍間今
大成殿上樑前二日慶雲見於曲阜卿等歸美朕躬之
詞朕不克當或者

上帝

先師鑒朕悚惕誠敬之心見茲雲物昭示瑞應朕不敢
矜言祥瑞但能功過相抵朕之幸也應擇日躬詣太學
文廟祭告以申感慶之衷朕躬被

先師之福佑普天士子誦法服膺同受

聖人之澤著將明年會試取中額數廣至四百名士子
科各省鄉試每正額十名加中一名其十名之外有零
數者亦加中一名此朕體奉

先師樂育之盛心特行造就人材之曠典諸士子其各
興文敦行益加勉旃宣付史館著照所請行

雍正十年壬子七月壬子

上諭禮部制科以四書文取士所以覘士子實學且和其

聲以鳴國家之盛也語云言為心聲文章之道與政治通所關鉅矣韓愈論文云惟陳言之務去柳宗元云文者所以明道不徒務采色夸聲音而以為能也況四書文號為經義原以闡明聖賢之義蘊而體裁格律先正具在典型可稽雖風尚日新華實並茂而理法辭氣指歸則一近科以來文風亦覺丕變但士子逞其才氣辭華不免有冗長浮靡之習是以特頒諭旨曉諭考官所拔之文務令雅正清真理法兼備雖尺幅不拘一律而

支蔓浮夸之言所當屏去秋闈期近可行文傳諭知之

八月乙亥衍聖公孔廣榮以

孔林工程告竣率其族人來京謝

恩

上召孔廣榮入見

諭曰爾為

至聖先師後裔當存聖賢之心行聖賢之事一切秉禮
守義以驕奢為戒且爾年齒尚少尤宜勤學讀書敦品

勵行凡爾同族之人亦當共相勸誡共相砥礪為端人正士爾等果能遵朕訓諭學問日進品行醇謹不墜家聲即所以報國恩也

雍正十一年癸丑正月壬辰

上諭內閣各省學校之外地方大吏每有設立書院聚集生徒講誦肄業者朕臨御以來時時以教育人材為念但稔聞書院之設實有裨益者少浮慕虛名者多是以未嘗敕令各省通行蓋欲徐徐有待而後頒降諭旨也

近見各省大吏漸知崇尚實政不事沽名邀譽之為而讀書應舉者亦頗能屏去浮囂奔競之習則建立書院擇一省文行兼優之士讀書其中使之朝夕講誦整躬勵行有所成就俾遠近士子觀感奮發亦興賢育材之一道也督撫駐劄之所為省會之地著該督撫商酌舉行各賜帑金一千兩將來士子羣聚讀書須豫為籌畫資其膏火以垂永久其不足者在於存公銀內支用封疆大臣等並有化導士子之職各宜殫心奉行黜浮崇

實以廣國家菁莪棧樸之化則書院之設於士習文風有裨益而無流弊乃朕之所厚望也

丙午

上諭內閣國家以制科取士原以覘士子所學而士子所學關乎世道人心是文體之所繫固甚重也士子讀聖賢書果能講求明體達用之學則以平日蘊蓄發為文章自然法正理純得聖賢語氣可以傳世而行遠此則有本之學有用之文為國家所重賴者若不於根柢講

求而但以華靡相尚則連篇累牘皆屬浮辭聖賢精義
既全無發明聖賢語氣又毫不相肖國家亦安用此浮
夸淺薄之士哉至於二三場策論尤足覘經濟實學乃
向來士子多不留心而衡文者又每以經義已經入彀
遂將策論濫收恕取不復加意閱看殊非設科本意今
會試伊邇著禮部先期曉諭應試士子於二三場文藝
均應努力殫心毋得潦草完卷試官如以限於時日不
能細心校閱後場不妨奏請展限務得真才以收實用

若所取試卷中有經義可觀而策論疵繆荒疎者朕惟於主考官是問

四月己未

上諭內閣國家聲教覃敷人文蔚起加恩科目樂育羣才彬彬乎盛矣朕惟博學鴻詞之科所以待卓越淹通之士俾之黼黻皇猷潤色鴻業膺著作之任備顧問之選聖祖仁皇帝康熙十七年特詔內外大臣薦舉博學鴻詞召試授職一時名儒碩彥多與其選得人號為極盛迄

今數十年來館閣詞林儲才雖廣而宏通博雅淹貫古今者未嘗廣為搜羅以示鼓勵自古文教修明之日必有瑰竒大雅之才況蒙

聖祖仁皇帝六十餘年壽考作人之盛涵濡教澤薄海從風朕延攬維殷闢門籲俊敦崇實學諭旨屢頒宜有品行端醇文才優贍枕經茹史殫見洽聞足稱博學鴻詞之選者所當特修曠典嘉與旁求除現任翰詹官員無庸再薦薦舉外其他已仕未仕之人在京著滿漢三品

以上各舉所知彙送內閣在外著督撫會同該學政悉心體訪遴選考驗保題送部轉交內閣務期虛公詳慎搜拔真才朕將臨軒親試優加錄用廣示興賢之典茂昭稽古之榮應行事宜著大學士九卿會議具奏

五月癸未

上諭翰林院教習庶吉士所以造就人材使之沉潛經籍涵泳藝林可以典制誥之文鳴國家之盛也從前庶吉士皆就翰林院讀書教習大臣不時策勵是以身心約

東學殖易增館閣之間蔚然稱盛朕意今科選拔庶常
仍令在衙門讀書俾教習諸臣得以朝夕訓課兼厚給
廩餼資其膏火庶幾枕經藉史文藻可觀克稱詞臣珥
筆之職其應查照前例及如何加與廩給之處著酌議
奏聞

雍正十二年甲寅十二月癸亥

上諭內閣鄉會兩闈乃國家抡才大典必須防範周密令
肅風清始足遴拔真才屏除弊竇朕聞各省鄉試之年

官字號舉子入闈者監臨提調等官有差人餽送飲食
果品之事雖無關於科場作弊然當關防嚴密之時有
人往來號房難保日久無僮倩傳遞之弊且恐民巷中
之有力者亦可借此作姦犯科不可不防其漸嗣後著
通行禁止倘有仍蹈前轍者一經發覺即照科場作弊
例將與受之人一同治罪

是日

上諭禮部畿輔為天下首善之地是以各府州縣童生入

學之數昔年曾加恩增添以示鼓勵惟宣化府屬之蔚
州從前原隸山西廣平府屬之磁州從前原隸河南及
改歸直隸之後其入學仍照晉豫原額未與直隸一體
邀恩又新從山西改歸易州管轄之廣昌縣入學之數
尚不及直隸小縣此兩州一縣均當酌議加增每遇鄉
試之年宣化府屬另立旦字號與奉天府屬夾字號額
數相同各取中三名今宣郡人材較前漸盛又添蔚州
一屬應舉人數加多查夾字號前已廣額二名則旦字

號亦應加增中式之數著禮部定議具奏

大清世宗敬天昌運建中表正文武英明寬仁信毅大孝
至誠憲皇帝聖訓卷十

欽定四庫全書

大清世宗敬天昌運建中表正文武英明寬仁信毅大孝
至誠憲皇帝聖訓卷十一

武功附武備

雍正元年癸卯正月丙午策妄阿喇布坦使臣垂
納木喀等朝見

上命都統拉錫理藩院尚書特古忒傳

諭曰爾國台吉在我

聖祖皇考時雖有微勞亦多罪戾乃無故侵我哈密發兵
往招殺害拉藏毀壞佛教惟天子統御萬邦理宜興師
問罪我

聖祖皇考至仁如天但令陳兵邊境俟其深悔前非即加
恩寬宥竝無意於殄滅爾國也其後澤卜尊丹巴胡土
克圖為策妄阿喇布坦再三求救我

聖祖皇考追念舊日微勞又曲鑒胡土克圖老人懇款之
意允其所奏令遣使往諭待其伏罪自陳即降

恩旨今

聖祖皇考升遐朕纘承大寶胡土克圖老人遠來再為奏請是以復遣使於爾若爾台吉即遣親信之人誠懇陳辭朕即寬宥以寧爾土宇若冥頑不靈仍構兵端亦可明言其意如欲廣我

聖祖皇考之仁恩惟爾台吉欲振我

聖祖皇考之武烈亦惟爾台吉朕仰承丕緒行我軍威爾台吉詎不稔知今胡土克圖大喇嘛又已圓寂從此亦

無有為爾台吉奏請者矣可作速定奪來奏若仍前支
吾則兵由爾起無與於朕也爾非專使故不與爾敕書
爾其謹識朕言一一往諭

八月甲子兵部分別議叙陝西四川雲南官兵平
定西藏功

上諭曰平定西藏乃自古未至之絕域所以

皇考曾有從優議敘之

旨況

皇考當春秋高邁備兵於極邊宣揚威畧峻德鴻功允垂
億萬斯年之美政也此一次議敘軍功前固無例可援
後亦不得為例將軍延信著封為貝勒兩路率領八旗
官員進勦之將軍等著給與世襲三等阿達哈哈番叅
贊大臣給與拜他喇布勒哈番副都統營總等給與拖
沙喇哈番其護軍校驍騎校給與頭等功牌二面仍加
一級綠旗官員經大將軍等咨送冊開頭等者照攻取
打箭爐功加一倍二等者功加五等三等者功加二等

至於滿洲漢軍綠旗之外委官俱係一體効力人員無論由部委外委概行從優議叙以仰副我

皇考恩綸特沛從優議叙之

諭旨

丙寅兵部分別議叙福建官兵克復臺灣功

上諭曰臺灣地方自古未屬中國

皇考聖畧神威取入版圖逆賊朱一貴等倡亂佔據臺地皇考籌畫周詳指授地方官員遣調官兵七日之內勦除

數萬賊衆克復全臺

皇考當春秋高邁威揚海外功德峻偉官兵感戴

皇考教養之恩奮勇攻取甚屬可嘉固不必援引前例後亦不得為例茲仰副

皇考從優議叙之曠典官員現行議敘功加外著概行各加一等總督蒲保雖有失陷地方之罪但一聞事發即親往廈門撫慰衆心遵依

皇考指示調遣官兵七日之內克復臺灣蒲保著兼兵部

尚書職銜提督施世驃統領大兵徑度海洋鼓勵將士
屢經大戰擊敗賊衆七日之內克復臺灣厥功甚大施
世驃著給與世襲頭等阿達哈哈番總兵官藍廷珍曾
協助施世驃著給與世襲三等阿達哈哈番水師營副
將許雲失陷臺灣非關伊罪奮勇前進多殺賊衆身又
陣亡著給與世襲拜他喇布勒哈番叅將羅萬蒼遊擊
游崇功俱係陣亡著給與世襲拖沙喇哈番總兵官歐
陽凱著追贈太子少保

雍正二年甲辰三月辛丑禮部議奏青海平定應
如王大臣所請行慶賀禮

上諭曰此次平定青海實由我

皇考簡用將帥之得宜豢養弁兵之有素伊等感恩効力
克奏膚功此皆

謨烈貽留豈可為朕有乎朕纘承

前烈守而弗違應行典禮勉從所請俟告祭

陵寢後擇日具奏

六月乙酉

御製平定青海碑文勒石國學碑文曰我國家受

天眷命撫臨八極日月所照罔不臣順遐邇通乂安兆人蒙
福乃有羅卜藏丹津者其先世顧實汗自國初稽首歸
命當時使臣建議畀以駐牧之地其居雜番羌密近甘
涼我

皇考聖祖仁皇帝睿慮深遠每厯於懷既

親御六師平定朔漠威靈所加青海部落扎什巴圖爾等

震龍言承命

聖祖仁皇帝因沛殊恩封為親王兄弟八人咸錫爵祿羈縻包容示以寬大而狼心梟性不可以德義化三十年來包藏異志朕紹登寶位優之錫賚榮其封號尚冀革心戢寧部衆而羅卜藏丹津昏謬狂悖同黨吹拉克諾木齊阿爾布坦溫布藏巴札布等實為元惡謂國家方宏浩蕩之恩不設嚴密之備誕敢首造逆謀迫脅番羌侵犯邊城反狀彰露用不可釋於天誅遂命川陝總督

太保公年羹堯為撫遠大將軍聲罪致討以雍正元年十月師出塞自冬涉春屢破其衆凡同叛之部落戈鋌所指應時摧敗招降數十萬衆又降其貝勒貝子公台吉等二十餘人朕猶憫其蠢愚若悔禍思愆束手來歸尚可全宥而怙惡不悛負險抗違乃決翦滅之計以方畧密付大將軍年羹堯調度軍謀簡稽將士用四川提督岳鍾琪為奮威將軍於仲春初旬禡牙徂征分道深入搗其窟穴電掃風馳搜剔巖阻賊徒倉黃靡潰窮蹙

失據羅卜藏丹津之母及謀逆渠魁悉就俘執擒獲賊衆累萬牲畜軍械不可數計賊首逃遁我師踰險窮追獲其輜重人口殆盡羅卜藏丹津子身易服竄匿荒山殘喘待斃自二月八日至二十有二日僅旬有五日軍士無久役之勞內地無轉輸之費克奏膚功永清西徼三月之朔奏凱旋旅饒鼓喧轟士衆訢喜四月十有二日以倡逆之吹拉克諾木齊等三人獻俘

廟

社受俘之日臣民稱慶伏念

聖祖仁皇帝威靈震於遐方福慶流於奕葉用克張皇六師殄滅狂賊行間將士亦由感激

湛恩厚澤為朕踴躍用命斯役也芟夷凶悖綏靖番羗俾烽燧永息中外人民胥享安阜實成

先志以懋有不績廷臣上言稽古典禮出征而受成於學所以定兵謀也獻馘而釋奠於學所以告凱捷也宜刊諸珉石揭於太學用昭示於無極遂為之銘曰

天有雷霆聖作弧矢輔仁而行威遠寧邇維此青海種
類實繁錫之茅土列在藩垣被我寵光位崇祿富負其
阻遐禍心潛構恭惟

聖祖慮遠智周瞻念荒服綏撫懷柔朔野既清西陲攸震
爵號渚加示之恩信如何兇狡造謀逆天鼓動昏慙寇
侵於邊惟彼有罪自干天罰桓桓虎貌爰張九伐王師
即路冬雪初零日耀組練雷響聲鉦蠢茲不順敢逆戎
旅奮張螳臂以當齊斧止如山岳疾如雨風我戰則克

賊壘其空彼昏終迷曾不悔戾當翦而滅斯焉決計厲
兵簡將往擣其巢踰歷嶽嶇坦若垌郊賊棄其家我繫
而獲牛馬谷量器仗山積蹇免失窟何所逋逃枯魚遊
釜假息煎熬師以順動神明所福旬日凱歸不疾而速
殪彼逆謀懸首藁街獻俘成禮金鼓調諧西域所瞻此
維雄特天討既申羣酋惕息櫜戈偃革告成辟離聲教
遐暨萬國來同惟我

聖祖親平大漠魏功煥文邁桓軼酌流光悠久視此銘辭

繼志述事念茲在茲

十月丁亥

上諭兵部奮威將軍岳鍾琪具奏副都統達鼐阿爾什總兵黃喜林王嵩孫繼宗營總蘇圖等統領大兵窮追羅卜藏丹津直至花海子拏獲丹津渾台吉及其妻子並招撫三十三家台吉當此口外水凍草枯之候官兵奮勇遠行甚屬可嘉自大將軍以下著從優議敘官兵勞苦朕甚憫之一切馱載輜重馬駝必多損傷著查明免

其賠補其軍營馬匹如有倒斃亦令領帑購買補數再馬兵每名賞銀八兩步兵每名賞銀六兩蒙古兵有隨軍効力者亦著奮威將軍按其行走効力等次應如何賞給之處確議奏聞

雍正五年丁未十月甲申川陝總督岳鍾琪題報
勦撫建昌冕山賊番事竣苗疆底定

上諭兵部冕山賊番向來逞惡肆姦敢行不法久為民害地方大吏畏難因循不肯辦理岳鍾琪遵旨勦撫調度

有方俾苗疆永遠寧謐甚屬可嘉岳鍾琪著交部議敘
并將在事官兵加恩議叙賞賚其兵丁等借支銀兩概
加恩賞給不必扣還

已酉雲貴總督鄂爾泰奏威遠新平猺賊倚恃深
山密箐專以刼殺為活比鎮沅蠢動二處猺賊遂
乘機聚眾焚掠鄉村臣隨飭征勦鎮沅之各路勝
兵一鼓擒勦現獲賊首餘黨就撫

上諭兵部猺賊倚恃險阻肆行不法為害地方鄂爾泰檄

令各路官兵乘勢勦撫兇犯成擒地方從此寧謐甚為可嘉著交部議叙總兵孫宏本奉該督調度實心効力勞績懋著著從優議敘烟瘴地方又值炎暑官弁兵丁等奮勇効力皆屬勤勞著從優議敘賞賚其中有染病受傷以致身故者俱照陣亡例一體恩卹

十一月戊辰雲貴總督鄂爾泰奏黔省邊界生苗不受管轄由來已久自勦撫長寨後各思投誠內附長寨後路克猛等處及馬頭山松把廣順州定

番州古羊山外等處俱聞風嚮化並獻弓弩盛甲

願附版圖

上諭兵部苗民梗化由來已久况屬生苗尤難懾服綏靖
鄂爾泰勦撫並用威惠兼施俾生苗等嚮化輸誠咸願
納賦歸附版籍又謬冲逆苗等素稱獷悍難馴今勦撫
已靖悉皆內嚮鄂爾泰辦理甚屬可嘉著由拜他喇布
勒哈番加授一等阿達哈哈番世職以獎勞績張廣泗
遵依鄂爾泰調度實心出力著交部從優議敘在事官

兵應如何議敘賞賚之處著鄂爾泰分別具奏

雍正六年戊申七月戊午雲貴總督鄂爾泰奏米
貼猱賊蠢動臣檄令鶴麗總兵張耀祖等三路進
勦已將首惡擒獲現檄軍弁攻取山壘以絕根株
上諭兵部米貼逆夷肆行不法抗拒官兵鄂爾泰令總兵
張耀祖等領兵深入直搗賊巢擒獲渠魁撫定餘黨在
事弁兵著從優議敘賞賚

乙丑諸王大臣等奏賀西藏平定

上諭曰阿爾布巴等背理妄行藐視國法朕為綏靖邊陲之計特命大臣領兵前往察究情由就近申討今據奏報頗羅鼐率所部兵馬先抵藏地其各寺喇嘛將首惡之阿爾布巴等三人獻出拘禁渠魁既已就擒藏地可以寧謐在大兵不發一矢在西藏未傷一人此等大事而成功之易若此是皆仰賴

上帝之垂慈

皇考之默佑實非朕涼德之所及也因諸王大臣等陳奏

將此宣諭知之

十二月丁酉

上諭兵部從前西藏用兵之時頗羅鼐甚為効力蒙

聖祖仁皇帝授為扎薩克台吉上年西藏噶隆等因嫉妬爭權彼此不睦阿爾布巴隆布奈扎爾鼐暗結匪類公然肆惡將朝廷敕封貝子總理事務之康濟鼐擅行殺害併欲害及頗羅鼐頗羅鼐受其逼迫領兵為康濟鼐復讎將逆黨罪狀奏聞是以朕特遣大臣等領兵前往

究問情由以便分別治罪頗羅鼐聞大兵將至率衆奮
勇前驅直抵藏地阿爾布巴等力屈勢窮被各寺喇嘛
拘執獻出欽差大臣到彼一一究問盡得其悖逆妄亂
之情已將阿爾布巴等及逆黨正法西藏殲此渠魁黃
教可興番衆可輯頗羅鼐深知大義討逆鋤姦俾無辜
受害者得雪沉寃背旨肆行者早正刑辟甚屬可嘉著
封為貝子以獎義勇以昭國憲

雍正七年己酉二月癸巳

上諭王大臣內閣九卿等準噶爾一部落原係元朝之臣
僕其始祖曰額森額森之子托渾漸至大員因擾亂元
之宗族離間蒙古恐獲重罪遂背負元朝之恩逃匿於
西北邊遠之處元末又煽誘匪類結成黨與遂自稱準
噶爾肆行劫擄迨至我朝有噶爾丹策妄阿喇布坦二
人世濟其惡擾害生靈滅棄釋教造孽多端不可枚舉
當我朝定鼎之初各處蒙古傾心歸順共輸誠悃請安
納貢求為屬國安享太平樂利之福八十餘年惟準噶

爾一部落遁居西北五千里之外擾亂離間衆蒙古肆
行劫奪噶爾丹身為喇嘛不守清規不遵佛教破戒還
俗娶青海鄂齊兒圖車臣汗之女為妻後又潛往青海
賊害伊之妻父鄂齊兒圖車臣汗擄其屬下人衆續因
喀爾喀七旗內彼此稍有嫌隙奏懇

聖祖仁皇帝為之和解因遣大臣同達賴喇嘛使者前往
噶爾丹遣人暗探消息遂以喀爾喀等卑視達賴喇嘛
使人為辭遣伊族內微末台吉多爾濟查布將喀爾喀

汗台吉等肆行陵辱喀爾喀汗等怒彼狂悖無禮會衆將彼殺害噶爾丹遂稱殺害伊弟多爾濟查布與喀爾喀構隙掩其不備發兵猝擊喀爾喀衆潰紛紛來投

聖祖仁皇帝深為軫念施恩育養遣使往噶爾丹處諭以兵為凶器令其與喀爾喀和好多方開導詎噶爾丹冥頑不靈借追襲喀爾喀之名入犯邊汛彼時即行勦滅復有何難我

聖祖仁皇帝好生為德遣使責問噶爾丹惶愧恐懼設言

撤兵乃竝不歸伊住牧之所仍潛居克爾倫圖拉地方
暗行窺伺

聖祖仁皇帝復遣使降旨諭以應回原住牧地方噶爾丹
佯稱遵奉諭旨仍乘隙潛掠沿邊蒙古之畜牧衆蒙古
不獲安居我

皇考遂上告

天地親統大兵聲罪致討噶爾丹輒敢逆天與我西路大
兵接戰伊軍大敗妻子被擒噶爾丹窘迫自殺彼時大

兵即應直搗巢穴收其部落我

聖祖仁皇帝恐天下後世有窮兵黷武之議因而中止策
妄阿喇布坦者噶爾丹之姪也與伊叔噶爾丹不相和
睦帶領七人潛逃至吐魯番地方居住

聖祖仁皇帝以策妄阿喇布坦向與伊叔不睦懼其誅害
遁跡逃生加以恩澤伊當感戴歸誠且

聖心仁慈不忍遣兵將噶爾丹餘剩部落悉行勦滅恩加
格外遣使賞給策妄阿喇布坦彼時策妄阿喇布坦力

弱勢微甚為恭順其後離間伊之妻父圖爾古特之阿玉氣汗與其子三濟扎布誘三濟扎布攜帶萬餘戶至伊住牧之處因而強佔入已從此遂不安分肆意妄行窺伺青海擾害生靈率領賊兵前進被哈密駐防輕兵擊敗遁回策妄阿喇布坦又假黃教為名潛兵入藏無故害伊妻弟拉藏汗毀壞寺廟殺害喇嘛搶掠供器是以特遣大臣前往詢問乃伊愍不畏死阻兵抗命使臣率師甚少兵力單弱伊得以愈肆猖狂

聖祖仁皇帝仍賜包容諭令邊外兩路大兵緩進屢次遣使示以

聖意謂策妄阿喇布坦果能悔過懇恩具奏其時另降諭旨若仍怙惡不悛然後將此部落人衆悉行勦滅此我聖祖仁皇帝之本意也朕紹登大寶策妄阿喇布坦雖遣使求和朕知非伊本懷諭伊來使云爾歸告知爾台吉朕纘承我

皇考大統爾台吉若欲受我

皇考天恩須盡改前非遵朕諭旨定界安居若欲犯我

皇考天威任爾備兵前來定當加以天討如此降旨分晰
利害遣使前去又恐策妄阿喇布坦心懷疑貳將兩路
大兵盡行撤回乃伊因此愈生驕傲於定界一事妄欲
侵佔界地朕又向伊來使降旨云爾告知策妄阿喇布
坦定界一事實於伊身有益如遵奉諭旨即遣使具奏
若不遵諭旨亦必遣使前來乃伊並不回奏此際策妄
阿喇布坦身故伊之長子噶爾丹策零遣使前來奏聞

伊父身故之事稱伊父已經成佛又稱欲使衆生樂業
黃教振興等語噶爾丹策零不過邊遠部落一微末台
吉耳使衆生樂業黃教振興豈伊應出之語耶況伊果
欲求和應代伊父謝罪懇恩送回青海叛逆潛逃之羅
卜藏丹津以贖前愆乃竝不輸誠向化敢以如許妄誕
之詞見之陳奏此特欲倣倣伊父之故轍耳聞噶爾丹
策零甚屬凶暴且西藏阿爾布巴隆布奈扎爾圖等濟
惡同謀將實心為國效力之貝子康濟圖殺害此等叛

逆罪狀皆因準噶爾與伊處相近而逃去之羅卜藏丹
津原係伊等姻戚彼此相依是以敢於悖逆迨其窘迫
倉猝之時則必投奔準噶爾亦屬顯然因頗羅鼐奮勇
直前截其去路阿爾布巴等未得前進即被擒獲準噶
爾性好搶掠若留在衆蒙古游牧地方將來必受其害
今朕已將來使遣回若伊諸事俱遵旨陳奏臨時朕另
行裁奪降旨倘仍前推諉矜張肆恣負朕屢次遣使開
導指示之仁恩抗玩不恭將來噶爾丹策零斷非安分

守法之人必至生事妄為况西北兩三路大兵盡已撤回此際伊等如或生事則我朝如許安享太平之喀爾喀等及辦理安插妥貼之青海西藏必至被其擾害甚屬可慮且此事乃

聖祖皇考注意未完之事仰賴

上天眷佑

聖祖皇考福澤國帑充裕官員弁兵同心奮勇願為國家効力實係可以舉行之會若遲疑不決定貽後悔夫用

兵者國家不得已之事也窮兵黷武為聖帝明王之所
深戒而以大加小以強陵弱又仁人君子之所恥而不
為者況準噶爾彈丸之地又在極北之區得其土不足
以耕耘得其民不足以驅使即使滅此朝食亦不足以
誇耀武功此皆朕所熟思而詳審者也但留此餘孽不
行翦除實為衆蒙古之巨害且恐為國家之隱憂今天
時人事機緣輻輳時不可遲機不可緩天與不取古訓
昭然且我

聖祖皇考為此籌畫多年未竟其事茲當可為之時朕不敢推諉亦不忍推諉此朕一人之見也用兵大事所關甚重不可輕率著諸王議政大臣九卿八旗大臣各抒已見公同詳確密議具奏

四月壬寅

上以征討準噶爾噶爾丹策零躬詣

太廟告祭其文曰恭惟我

列祖聖德神功涵蓋宇宙莫不尊親獨厄魯特策妄阿喇

布坦世濟克頑自其叔噶爾丹悖肆猖狂我

皇考聖祖仁皇帝親率大軍翦除元惡以策妄阿喇布坦
素未同逆遺餘部落聽其收撫

恩澤至渥乃不思銜感漸恣鴟張殘破拉藏荼毒生靈
皇考應時戡定猶未忍即加勦戮

宣諭再三冀其知悔臣紹位以來復申諭旨伊雖遣使乞
和乃敢容留逋叛挾詐怙惡旋服冥誅其子噶爾丹策
零雖亦遣使詣闕而心志詭譎言辭誕妄揆其姦狀若

不迅行撲滅將來必為蒙古之巨害貽中國之隱憂臣夙夜思維茲乃我

皇考計慮多年經營未竟之緒繼

先志以行師事非得已順

天心而致討機不容遲廷議僉諧戎行齊奮是用簡帥臣而授鉞占良日而禡牙仰憑

列祖功德崇隆聲靈赫濯旌旗所向立靖氛塵鐃鼓還歸早聞凱奏永綏藩圉萬邦戴丕冒之天惠保邊黎九服

導蕩平之路謹告

五月乙巳

上諭出征大將軍副將軍參贊大臣官弁兵丁等準噶爾
狡獪兇頑父子濟惡為邊境蒙古之隱患朕仰承

皇考聖祖仁皇帝先志特發兩路大兵聲罪致討當四海
昇平之時國用充裕朕細加籌畫計議再三凡命將遣
官派兵運餉以及車馬甲冑兵器耕具之屬無不經理
周詳備辦豐足弘綱細目具有規條而派出之官弁兵

丁等踴躍歡忻爭先恐後其急公勇往之意甚為可嘉
此蓋弁兵等素懷忠君報國之心而又受

皇考六十餘年教養之澤感恩慕義出於惓忱故奮發之
氣若斯之壯也然軍器當壯而軍心則不可驕孔子論
行軍之道曰必也臨事而懼好謀而成而以暴虎馮河
為戒書經曰今予其恭行天之罰可知古昔聖人於軍
旅之事倍加敬謹從未有以士飽馬騰兵甲堅利而遂
生驕矜之意忘嚴惕之懷也從來舉大事者固在人事

之經營而成大功者必賴

天心之眷佑若果仰邀

上天慈恩默垂保護則天地間非常之業不世之勲皆計
日可以成就而感格

上天之道惟有一誠一和聖人曰至誠感神又曰和氣致
祥古訓昭垂千載不易今此兩路大兵前往若自大將
軍以下兵丁以上皆存一片誠敬之心一團和合之氣
視國家之事如已事聯千萬人之心為一心以此感格

上蒼蒙

天心許一是字如此而大功不唾手告成者無是理也大將軍總統全師為三軍司命當開誠布公虛懷受益能謀於衆能斷於心勿以私意而泯人之勞勿以偏見而掩人之善信賞必罰惠愛嚴明副將軍參贊大臣等和衷協贊合志同心共展謀猷以成韜畧其一應文武官弁等各有所司均關重計祇奉將軍之令善導所轄之人務殫公心以襄偉績至於兵丁等應思祖孫父子世

受國恩今當執戈荷戟之時正効力酬恩之會况朕以至公訓諭大小臣工將軍等秉公心以馭士卒有功必錄有過必懲正宜乘時黽勉以圖上進古人以共為一事比於同舟言其休戚相通憂樂與共也朕謂今日之事自將軍以下兵丁以上不但有同舟之誼實乃一體之親朕為元首以股肱耳目視爾等爾等衆人彼此聯屬之情當如手足臂指之痛癢相關肫誠固結不可藏嫉妬之念不可懷推諉之心且不但不可不當存退縮規避

之私衷亦竝不應存輕進貪功之淺見蓋一人立功其功小衆人立功其功大果能以誠心和氣感格

上天錫福垂恩膚功克奏則凡行軍預事之人皆有光榮膺爵賞於朝廷垂令名於奕世豈不美歟朕自運籌軍務以來及師旅起程以後朕之一心時刻在於戎陣之間爾等宜共體此心也

雍正九年辛亥十月甲寅振武將軍順承親王錫保奏準噶爾賊人領兵二萬六千侵取喀爾喀遊

牧臣令王丹津多爾濟額駙策凌等合兵擊賊列陣力戰自辰至午斬賊將喀喇巴圖魯直抵巢穴奮勇擒殺賊兵遠遁

上諭辦理軍機大臣等喀爾喀副將軍親王丹津多爾濟郡王額駙策凌等率領喀爾喀弁兵奮勇爭先戰敗準噶爾勦殺擒賊甚屬可嘉丹津多爾濟從前効力已加恩封為親王著賞銀一萬兩郡王額駙策凌晉封為和碩親王亦賞銀一萬兩扎薩克圖汗親王策旺扎布雖

未歷戰陣在軍營同順承王宣力辦事亦賞銀五千兩
其餘王貝勒貝子公衆台吉官員兵丁內懋著勤勞者
著順承王查明具奏加恩優賞

雍正十年壬子九月乙酉

上諭辦理軍機大臣等此次準噶爾逆賊志欲搶奪澤卜
尊丹巴胡土克圖侵掠喀爾喀部落直越察罕叟爾大
營由杭愛山肆行猖獗王丹津多爾濟額駙策凌參贊
大臣塔爾岱及諸王大臣台吉等共領蒲洲蒙古喀爾

喀等兵二萬奮勇尾追千里到鄂爾昆河厄爾得尼拓
地方諸王大臣及台吉官兵等同心協力為國輸誠奮
勇攻擊將三萬逆賊斬殺大半餘賊喪膽奔逃其屬可
嘉此次軍功非尋常勞績可比官員兵丁著從優議敘
其隨從額駙策凌在克爾森齊老地方擊賊官兵著加
倍議敘領兵効力之王貝勒貝子公扎薩克台吉等應
賞巴圖魯名號陞授職銜今於議敘軍功之先特沛恩
綸喀爾喀和碩親王丹津多爾濟著賞給智勇名號喀

爾喀和碩親王額駙策凌著賞給超勇名號喀爾喀多
羅貝勒冊卜登從前在阿爾泰軍前著有勞績去年在
蘇克阿爾達胡地方攻擊準噶爾又懋著勤勞朕已賞
給信勇名號此次在厄爾得尼招大敗準噶爾賊衆又
復追擊効力前驅冊卜登著封為多羅郡王扎賴特固
山貝子特古斯從前在阿爾泰軍前曾効力行走此次
在克爾森齊老擊賊甚力在厄爾得尼招又復大敗賊
衆建立功勲特古斯著封為多羅貝勒敕漢輔國公羅

卜藏隨從額駙策凌在克爾森齊老擊賊又在厄爾得
尼拓大敗賊衆又與貝勒冊卜登塔爾岱等追擊賊衆
効力前驅羅卜藏著封為固山貝子喀爾喀扎薩克一
等台吉巴海從前在阿爾泰軍前曾効力行走去年亦
著有勞績此次在厄爾得尼拓大殺賊衆建立功勲喀
爾喀扎薩克一等台吉葛木丕爾去年懋著勞績此次
在克爾森齊老額駙策凌隊內力戰得傷回至察罕叟
爾軍營調治痊好復行前往追擊賊人巴海葛木丕爾

俱著封為輔國公塔爾岱著授為黑龍江將軍統領軍營東三省兵丁卓爾海著授為內大臣署理黑龍江將軍事務其餘扎薩克喀爾喀王貝勒貝子公台吉內若有似此勞績出衆之人而遺漏者著大將軍順承親王丹津多爾濟額駙策凌查明具奏

十月癸亥

上諭辦理軍機大臣等喀爾喀副將軍王丹津多爾濟自用兵以來實心効力去歲奮勇追殺準噶爾賊人今又

在厄爾得尼拓統領滿洲蒙古喀爾喀兵丁大敗賊衆
斬馘萬餘挫其鋒銳賊人喪膽望風逃遁自是軍威遠
震疆圉寧謐喀爾喀扎薩克等可共享太平之福如此
建立大功雖賜伊墨爾根巴圖魯之號朕心猶為未足
向來外藩蒙古王等之子竝無晉封世子之例朕念丹
津多爾濟勞績昭著用加特恩著照宗室王等之例將
伊長子多爾濟色布騰封為世子再翁牛特貝子羅卜
藏喀爾喀扎薩克台吉齊旺俱在厄爾得尼拓奮勇殺

賊貝子羅卜藏著晉封為貝勒扎薩克台吉齊旺著晉封為輔國公

雍正十一年癸丑八月丙辰

上諭辦理軍機大臣等據署寧遠大將軍查郎阿等奏稱庫爾墨圖山地方有逆賊五十餘人來侵被我官兵奮力攻擊斬殺二十餘人餘俱生擒未脫一騎等語此次經理調撥甚屬可嘉所有効力人員俟查郎阿查明等次具奏到日再降諭旨數年以來因西路將軍等辦理

疎忽是以逆賊敢於玩視今賊兵經此番傷損必懷畏懼或於今秋即整兵侵犯西路或於冬天侵犯北路俱未可知著傳諭查郎阿等令其詳悉籌畫辦理

雍正十二年甲寅正月甲申

上諭辦理軍機大臣等據查郎阿摺奏由準噶爾來投之厄魯特巴圖濟爾噶爾稟稱噶爾丹策零欲前來請和或遣準噶爾之人為使或即用內地之人尚在未定又據賊營脫出投赴北路之人亦稱噶爾丹策零現在行

查被獲人等意欲遣還請和等語朕思逆賊欲遣使請和者特為安輯部人紛擾我軍之計耳定非實意若不准其所請則必傳諭所屬曰我為爾等業經引罪求和無奈所請不准用以固結士心而使我軍聞之亦以賊請和而不允遂至懈於効力如此奸謀詭計不可不加詳察爾等密咨兩路大將軍賊若遣使前來但諭以朝廷欲偃息甲兵使衆生樂業屢經遣使爾台吉並無欲和之意每藉端推托今果引罪請和須派親信之人如

台吉寨桑等將應行事理詳議前來方為奏達乃止令爾等微員及內地微末之人前來未便收納如此曉諭方合事理至我兵進剿之計斷不可因此遲回濡滯仍照常整備相機舉行

三月己亥雲貴廣西總督尹繼善奏進剿普思逆夷大捷

上諭內閣普思一帶土賊猖狂皆前歲漏網之賊首自號神仙迫脅夷民煽惑滋擾今總督尹繼善檄飭各路將

弁周儀等尅期進勦擒斬首惡神仙喃奔等二百餘名
招出投誠夷民八千餘名尚有賊首召補達等三名及
其餘黨竄匿未獲攸樂思茅一帶悉已蕩平尹繼善悉
心調度俱屬妥協自應乘此軍威將首惡盡殲餘黨盡
掃以期一勞永逸至擒獲賊首當即行正法其眷屬即
行分賞投誠之衆急宜撫綏脅從之徒量加懲治凡事
每懈於垂成忽於既定尹繼善甫制滇南雖心力俱強
而威信未立此舉實闕三省籌畫非僅為元新普思計

也可傳諭尹繼善知之

附
武備

雍正二年甲辰閏四月乙未

上諭沿海各省督撫提鎮等出洋巡哨船隻最為緊要舊
例地方官承管修造營員每多方勒索不顧州縣賠累
地方官惟知交結營員囑其收受彼此俱挾私心修造
豈能堅固以致出洋船隻易至朽壞重修朕深知其弊
欲改歸營員修造使州縣無賠累之苦而於軍政似實

有裨益爾等可會同速行確議具奏若有不可行處不可迎合強以為是

七月甲子辦理船廠事務給事中趙殿最奏船廠地方應建造

文廟設立學校令滿漢子弟讀書考試

上諭內閣文武學業俱屬一體不得謂孰重孰輕文武兼通世鮮其人我滿洲人等因居漢地不得已與本習日以相遠惟賴烏喇寧古塔等處兵丁不改易滿洲本習

耳今若崇尚文藝則子弟之稍穎悟者俱專意於讀書
不留心於武備矣即使果能力學亦豈能及江南漢人
何必舍已之長技而強習所不能耶我滿洲人等篤於
事上一意竭誠孝於父母不好貨財雖極貧困窘迫不
行無恥卑鄙之事此我滿洲人之所長也讀書者亦欲
知此而行之耳徒讀書而不能行轉不如不讀書而能
行也本朝龍興混一區宇惟恃實行與武畧耳竝未嘗
恃虛文以粉飾而凡厥政務悉脗合於古來聖帝明王

之徽猷竝無稍有不及之處觀此可知實行之勝於虛文矣我滿洲人等純一篤實忠孝廉節之行豈不勝於漢人之文藝蒙古之經典歟今若崇尚文藝一概令其學習勢必至一二十年始有端緒恐武事既廢文藝又未能通徒成兩無所用之人耳理宜遵朕從前所降毋棄滿洲本習之諭旨專令兵丁人等各務實行勤學武畧以敦儉樸之習何必留意於此等無有實效之處以貳兵丁之心強其所不能而徒事於虛名也此皆妄聽

發遣人內稍能識字之匪類不顧大體肆言搖惑之所致耳果能盡心鼓勵得材勇卓越者數人以備朕之用俾保障國家收股肱之效較之成就一二鴛劣無能之生員為遠勝也將朕所降諭旨及此奏請之處曉諭烏喇寧古塔等處人等知悉竝行知黑龍江將軍共相勉勵但務守滿洲本習不可稍有疑貳再通行京城八旗人員知之在京之滿洲人等與盛京烏喇等處之滿洲不同文武二藝俱為不得不學之事如果二者兼優朕

必重用但人之能精一藝者尚少二者兼優自必更少
矣儻不能造詣是徒成一無用之人也滿洲子弟雖教
以讀書亦不可棄置本習果有可學之子弟務須加意
教訓俾其精詣優通如不能望其精詣者仍應令其學
習滿洲之武畧騎射勿但崇尚文藝以致二者俱無成
就而以滿洲之武畧為可鄙也惟我滿洲本習純一篤
實忠孝廉節之行所宜敦勉

雍正三年乙巳八月丙子

上諭內閣滿洲兵丁於技勇武藝俱已精練惟向來未習水師今欲於天津地方設立水師營分撥八旗滿洲前往駐防操演似屬有益其應於何處駐劄設立幾營派兵若干用船若干竝如何製造船隻如何演習兵丁之處著怡親王會同朱軾張廷玉蔣廷錫拉錫詳議具奏
雍正四年丙午九月甲辰

上諭內閣古者射御居六藝之中聖人所重本朝開國以來騎射精熟歷代罕有倫比旗人凡少長貴賤悉皆專

心練習未有一人不嫻熟弓馬者士子應試必先試其騎射合式方准入闈蓋恐其專習文藝或致騎射生疎故先以此試之即今部院堂司官亦每月如期在本旗教場該管都統佐領看練弓馬所謂有文事者必有武備創制立法之意誠深遠也近來文官外任之人漸漸不習於騎射若聽其因循怠惰將來必致騎射生疎豈國家創制立法之意乎凡旗人外任文官六十歲以下者限二年之內仍須熟練騎射儻二年後有不能騎射

者該督撫即行叅劾若督撫徇隱經朕察知將督撫一併治罪

雍正五年丁未二月癸亥

上諭兵部水師甚屬緊要現今天津設立水師令蒲洲官兵操練學習其江寧駐防滿洲官兵亦應照天津例設立水師將鎮江水師現有船隻酌量撥給江寧將軍令其學習操練

雍正六年戊申十二月己亥工部議覆

盛京戶部侍郎兼理奉天府府尹王朝恩條奏各省
修造戰船舊例督撫轉委中軍驗看以致需索徇
隱船隻不能堅固嗣後務須各該督撫親驗應如
所請

上諭曰戰船關係緊要若僅委中軍驗看或彼此瞻徇情
面不據實詳覆致使物料柔脆不能經久嗣後修造戰
船當造成之日其船廠附近省城者著在城之督撫提
鎮及布按兩司親往驗看其船廠離省遠者著附近府

城之文武大員公同驗看務令修造堅固儻有不能堅固及浮冒侵蝕等弊即行題叅治罪庶承修之文職有所顧忌不敢草率浮銷而監工之武弁亦可免借端需索之弊著該部遵諭速行

雍正七年己酉閏七月乙亥

上諭兵部訓練營伍之道必技藝精熟方有濟於實用聞直隸地方營汛中鎗手演習止放空鎗從未裝入鉛子打把似此則信手高低漫無準則何由純熟而成必中

之技直隸幾處如此則通省可知直隸一省如此則外省可知嗣後著通行直省督撫提鎮等轉飭所屬於練習火器之時用鉛子打把演熟準頭則火器皆成利用於營伍實有裨益

八月甲寅

上諭兵部盛京旅順地方雖設有水師官兵而俱不能諳練水師事務若無教習之員恐其有名無實著福建水師提督藍廷珍於千總內揀選數員於兵丁內揀選數

名熟諳水師者令赴盛京交與該將軍令其教習旅順水師官兵其由福建起身之時著該督撫照資助送往浙江湖廣弁兵之例給與盤費

十月己酉

上諭莊親王等騎射乃兵丁最緊要技藝八旗大臣與章京等皆係率領兵丁出師行圍之人理應親率各官操演騎射嗣後遇平常較射之日俱著學習騎射若年逾五十五歲者聽之將朕此旨徧行曉諭

雍正九年辛亥八月癸丑

上諭王大臣等內務府佐領下每旗酌量增挑護軍或一百名或二百名設立鳥鎗營其作何操演及應給錢糧米石之處著莊親王內務府總管會同大學士等詳議具奏

乙卯

上諭內閣朕聞各省駐防兵丁技勇多屬生疎營伍亦覺廢弛所養馬匹多不足額漢軍尤甚且遇急用之時竟

有將營馬私賣者今特頒諭旨通行曉諭著該管大臣
官弁悉心整理勤加訓練務令軍容嚴肅武備周全朕
或於明年春月各差科道等官前往查看儻仍蹈故轍
一經叅奏定將該管大臣官弁嚴加議處

雍正十一年癸丑二月庚申

上諭兵部古云兵可百年不用不可一日不備所謂備者
非徒操練技勇演習行陣而已如馬匹軍裝礮火器械
軍行必需之物一一預備於平時及有事調撥便可刻

期起程不至拮据延緩此乃設兵之本意也我國家承平日久武備漸弛年來朕屢降諭旨諄諄訓飭雖該管大臣等稍知以訓練為務然馬力不足資裝器具不周每聞派遣之信勉強周章遷延時日所謂預備者但有虛名而無實際此則該大臣所當深知痛改加意整理者又如營中有必需之匠役不得不酌量給與兵糧數名以資養贍而將弁等每多借此名目將水火夫役等人多佔名糧又每將精壯兵丁多派為親隨不令當差

及遇頭目把總缺出即於此內拔補以致荷戈持戟者
差使繁多而不得上進之路朕向知此弊已屢降諭旨
切加申飭近聞此風仍未全改亦著該管大臣嚴行查
察毋得姑容又聞各營中間有公中餘利如甘州提標
馬廠之類原係存公備用而該管將弁往往據爲已有
收入私橐遇有過往應酬及營中雜費仍攤派兵丁而
不卹其艱苦此弊尤當禁革今再行曉諭儻敢視爲具
文仍蹈前轍勿謂罰不加衆希冀苟免其情罪輕者照

例處分情罪重者必在本地正法

雍正十三年乙卯二月辛酉

上諭內閣從來文武兩途國家竝重未嘗軒輊於其間而習其業者必專心致志不惑於他岐然後有所成就可以備國家之用每見無識之武臣沽名邀譽輒稱營伍中設立義學興文育材又或請令駐防兵丁子弟就近應該省鄉試此皆舍本逐末糊塗顛倒之見夫國家設立營伍原爲折衝捍禦之計營伍中提鎮大員乃弁兵

之表率也意之所嚮衆共趨之今乃浮慕讀書嚮學之
虛名而於持戟荷戈之地以文章翰墨相矜尚是本業
在武而注意於文必致弁兵等相習成風人材漸至軟
弱武備亦至廢弛豈整飭戎行之道乎彼弁兵之子弟
其資性聰慧可以讀書者聽其延師自課循例考試以
圖上進此乃兩全之道為提鎮大員者何必以虛名倡
率使之輕視本業且與其設義學以課文何如設義學
以課武尤為輕車熟路易於有成也至於各省駐防乃

專爲武備而設其子弟通曉文藝者原聽其來京應試以爲進身之路若准其在外就近鄉試則伊等各從其便競尚習文之名而漸忘用武之實將來更有何人可充駐防之選乎在京師則文武並用是以文武兼收在駐防則武備是資應以武途爲重卽如農工商賈各專其業然後可以收其效此古今不易之理奈何介在兩歧其流弊必至兩誤向後如仍有妄行奏請者朕必加以重處

大清世宗敬天昌運建中表正文武英明寬仁信毅大孝
至誠憲皇帝聖訓卷十一